

REGIONAL NEWS

HEADLINES:-

1. Inrinni chawhnu khan Saikhawthlir ram chhung Diltlang Lui zau-ah Assam official-te'n rubber huan an rawn suasam.
2. Huaissen chawimawina dawng tura thlan, Captain Lalrinawma Sailo chu November thla khian Rashtrapati Bhavan-ah President Droupadi Murmu-i'n Kirti Chakra a hlan ang.
3. Prime Minister Narendra Modi-a'n cheng vbch sing 1 leh sang 1 vel hu National Highway project lian 2, New Delhi-ah a hawng.
4. Sudan-ah Rapid Support Forces (RSF)-in an ramchhung hmar lam, El Fasher-a ral tlante awmna camp an beihnaah mi 31 aia tlem lo an thi.

<><><>

BORDER DISPUTE

Inrinni chawhnu dar 2:10 khan Mamit district Zawlnuam RD block chhunga Saikhawthlir ram chhung Diltlang Lui zau-ah Assam official-te'n rubber huan an rawn suasam.

Saikhawthlir VCP Pu Lalthuthlungmawia'n Akashvani Aizawl a hrilh danin an khaw mi 2-te rubber chinna huan rawn kalchilhtu Assam Police mi 8 leh Forest mi 2-te chuan an rubber phun sa leh la phun loh thlengin an tihchhiatsak vek a. An suasamsakte hi Pu Zoliana rubber kung phun tawh 240 leh la phun lohte bakah Pu Loba rubber kung 50 te a ni a, an kir leh hnu-ah rubber huan neitute hian a bul hnai a border Police Outpost chu hriattir mah se, an insaseng hman tawh a ni. He lai hmuna rubber chinte hi Chief Minister Rubber Mission hnuaia kalpui a ni a. Rubber phun a hna thawk a awm hmanrua te hi Assam official-te hian chhuhsak bawk a ni. Tukin khan Saikhawthlir khawtlang hruaituten helai bul hnai a Police border outpost tlawhin thil thlen dan an hriattir a, tun hnu a a thlen leh tawh loh na'na venhimna lam kalpui dan tur chungchangte an sawiho a ni.

Pu Lalthuthlungmawia chuan Assam Police leh Assam Forest te hi kuminah rubber chinna hmuna an rawn kal vawi hnihna a nih thu a sawi a. Tun thla ni 5 khan helai hmun ah hian lokalin rubber chinna hmunte hi an rawn thlithlai a, hemi tum hi chuan huan neitute pawh hawihhawm ang reng taka bia-in thla te an la a, an kir leh mai niin a sawi a. Kum kal ta lam pawh khan an rawn tibuai tawh thin niin a sawi bawk.

<><><>

POWERLESS

Nimin chhun dar 11:00 vel atang khan Khawzawl, Champhai leh Saitual District a Ngopa tlangdung-in Zuangtui atanga Power supply darkar 28 chhung an dawn theih tawh loh avangin mihring khawsak phung nasa takin a khaihlak mek.

Power & Electricity department hotute hnen atanga thu dawn danin Kawlphetha awm loh chhan hi Keifang leh Khawzawl inkar Tuivawl lui kam ah transmission line chhia awmin ngawrh taka siam mek a ni a, Saitual leh Vankal inkarah 132KV line chhiain Kawlkulh ram chhunga R-Phase Polymer disc a puncture bawk a, thlak mek niin an siam that theih hun tur hriat a ni rih lo ani.

Hetihlai hian Champhai leh Khawzawl district-in Power an lakna pakhat, Serchhip Bukpui - East Lungdar - Khawzawl - Champhai 132 kv power line chu Serchhip leh Keitum inkarah Power banpui a tluk chhiat avangin Khawzawl leh Champhai District te hian Line dang atangin Power an dawng thei chuang lo a ni.

<><><>

KIRTI CHAKRA

Indo lai ni lova sipai chawimawina sang ber dawttu Kirti Chakra dawng tura thlan, Captain Lalrinawma Sailo (IC-88733Y) 4 PARA (Special Forces) chu November thla khian Rashtrapati Bhavan-ah President Droupadi Murmu-i'n Kirti Chakra a hlan ang.

Akashvani Aizawl zawhna chhangin, Captain L. Sailo pa, Pu Saihmingliana Sailo chuan tunhnaia sorkar laipui-in Pakistan-a mifirfiakte laka beihpui a thlak, Operation Sindoor-a a thawh that avangin an fapa, Captain Lalrinawma Sailo chu sipai chawimawina sang ber dawttu Kirti Chakra dawng turin President chuan a pawmpui a. Kumin November thla khian Rashtrapati Bhavan-ah President Droupadi Murmu in Kirti Chakra hi a hlan dawn ani a ti a. Mi tam takin thih hnua sipai chawimawina sang an dawn laia, an fapa in a damlaia a dawng tur leh hlawhtlinna a chang chho chu Pathian venhimna zar a zo vang a ni a ti a, Mizo mipuite'n an ngaihhlutsak avangin an chhungkua an lawm hle tih a sawi bawk.

Kum 26 mi, Captain Lalrinawma Sailo hi Pu Saihmingliana Sailo leh Pi Lalthianglimi, Chanmari veng, Aizawl te fa pathum zinga naupang ber niin, kum 1999 khan a piang a. Kendriya Vidyalaya, Zemabaw, Aizawl-ah zirna bul tanin, kum 2013-ah Rastriya Indian Military College, RIMC, Dehradun-a zir turin a inziak tling a, RIMC atanga pawl 12 a zir zawhah, UPSC buatsaih NDA & NA Exam-ah tlingin, National Defence Academy, NDA ah kum 3 a zir hnua Indian Military Academy, IMA kum 1 zir lehin, IMA atangin Indian Army officer-ah commission a ni a, tunah hian Udampur, Jammu headquarters ah 4 PARA (Special Forces) Captain-in a awm mek a, 4 PARA-a a awm chhung chuan helai hmunah hian a awm dawn niin a pa chuan a sawi a ni.

Kirti Chakra dawng tura thlan, Capt. Lalrinawma Sailo hi Mizoram hrulaitu hrang hrang te chuan an lawmpui thu leh an chhuan thu an sawi a. Larsap Gen. V.K. Singh chuan a Instagram account ah Capt. Lalrinawma Sailo chu Kirti Chakra dawngtu tur ni 4 chauh thlan chhuah zinga tel a ni chu ropui a tih thu leh Mizo zinga he chawimawina kum 1968 a lo dawng tawhtu Subedar Chalhna Lushai dawta dawng leh hmasa ber a nih thu a sawi a. A huaisenna leh mahni hmasial lova hna a thawh dan chu Mizoram leh India tan chhuanawm tak a ni a ti a. A hma lam hunah hlawhtlinna nei zel turin duhsakna a hlan bawk a ni.

Chief Minister Pu Lalduhoma pawhin social media kaltlangin lawmpuina thu a sawi a, India rama Peacetime Gallantry Award sang pahnihna Kirti Chakra (Wheel of Glory) dawngtu Capt Lalrinawma Sailo chu a lawmpuiin a chhuang hle tih a sawi a. He chawimawina sang tak a dawng hian Mizo thalaite theihna ropuizia a tarlang nia sawiin, theihtawp an chhuahna apiangah mi chung a leng thei an ni tih a zirtir a ti a, a kal zelna turah duhsakna a hlan a. Home Minister Pu K. Sapdanga leh Sports Minister Pu Lalnghinglova Hmar te pawhin social media hmangin Captain Lalrinawma Sailo an lawmpuina thu an sawi a, an chhuan thu leh duhsakna an hlan thu an sawi sbawk a ni.

Home department atanga thudawn danin Capt. Sailo hian Mizoram sorkarin hriattirna a lo chhuah tawh angin chawimawina a sang tak a dawn avang hian cheng nuai 10 lawmpuina pek a ni dawn a ni.

<><><>

LADC

Naktip, Thawhlelni khian BJP hrulaitu chief executive member (CEM) Pu N. Zangura kaihhruai sorkarin thlawptu a ngah leh ngah loh Lai autonomous district council (LADC)-ah fiah a ni dawn.

Larsap Gen. Vijay Kumar Singh chuan Lai autonomous district council (LADC) chief executive member (CEM) Pu V. Zirsanga'n Ningani kalta a banna a theh luh chu hemi ni vek hian a pawm a. Hemi ni vek hian united democratic alliance (UDA) legislature party hrulaitu Pu N. Zangura chu CEM atan ruat ani a district council & minority affairs (DC&MA) department chuan Zirtawpni khan hriattirna chhuahin CEM atana Pu N. Zangura ruat a nih thu hi an puang a. LADC-ah sorkarna chelh thei turin thlawptu a ngah tawk em tih August ni 19-a finfiah turin a hriattir nghal a ni. Pu Zangura chuan thlawptu a ngah tawk leh ngah tawk loh fiahna (floor test) hi a awm a nih phawt chuan a fiah theih ngei a inbeisei tlat thu Akashvani Aizawl a hrih a. Lai zirlai pawlte'n a hma ang khan harsatna an siam loh a beisei thu leh tun dinhmunah chuan boruak tha lo a awm lo niin a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM INAUGURATES

Prime Minister Narendra Modi-a'n India siamchhuah thilte ring ngama lei turin ram mipuite a ngen. Vawiin New Delhi-a cheng vbch sing 1 leh sang 1 vel hu National Highway project lian 2 a hawnnaah he thu hi sawiin India a lo chak lehzual theih nan leh ram intodelh anih theih nan Chakradhari Mohan-a kawng zawh ve turin mipuite a ngen a ni.

Delhi khawpuia lirthei tawt lutuk tih ziaawmna tura ruahman highway project hawnte hi Dwarka Expressway Delhi Section leh Urban Extension Road-II (UER-II) te a ni a, Km 10 leh meter 1-a thui, Dwarka Expressway hi cheng vbch sang 5 chuang senga siam a ni a, Alipur leh Dichaon Kalan inkar UER-II siam nan cheng vbch 5580 vel hman ral a ni bawk.

<><><>

SUDAN KILLING

Sudan-ah paramilitary Rapid Support Forces (RSF)-in ramchhung hmar lam, El Fasher-a ral tlante awmna camp an beihnaah mi 31 aia tlem lo an thi a, midang 13-in hliam an tuar bawk. Thi zingah hian naupang 7 leh nu naupai lai 1 an tel a ni.

Coordination of Resistance Committee sawi danin, RSF hian tukin atang khan beihpui hi thlak tanin chawhnu her thlengin an kap a, chenna in tam tak leh hmun pawimawh tam tak an kap chhia a ni.

El Fasher khawpui chauh hi Darfur-a RSF thunuaia la awm lo a ni a, Sudan sorkar sipai leh RSF inbeihna kal zel avangin nikum May thla atang khan khawpui hi hual beh a ni a, damdawi leh eitur bakah nitin mamawh thil a van tawh avangin civil mi sang telin harsatna lian tak an tawk mek a ni.

<><><>